

«Sch'jeu mon buca quella via, anfel jeu forse mai ruaus»

Sora Armina Maissen da Siltginas/Sumvitg festivescha dumengia il giubileum da profess dad aur

CUN SORA ARMINA
HA SUSI ROTHMUND / ANR DISCURRIU

■ **Sora Armina Maissen dalla sulegli-va ucliva Siltginas sur Sumvitg ei entrada en claustra per daventar sora dominicana ch'ella haveva mo biebein 18 onns. Quei ei stau ils 15 da fevrer 1966 e dumengia astga ella festivar ensemen cun ulteriuras giubilaras e massa hosps envidai il giubileum da profess dad aur en claustra a Glion.** L'Agentura da novitads rumantscha ei s'entupada cun sora Armina ella claustra a Glion per discuorer da sia affonza en ina famiglia religiosa a Siltginas, dalla clamada claustrala e dalla veta. Pil termin da fotografar ha ella perfin schau entrar en siu biro ella clausura dallas muniessas.

Cun cons onns essas Vos entrada en claustra?

Sora Armina: Cun biebein 18 onns.

Tgei ei stau il motiv per quella decisiun?

Quei ei buca stau la cuminonza. Cuminonza havevel jeu avunda a casa en nosa gronda famiglia. Nus eran dudisch buobas. Jeu level dar profunditad a mia veta da cardientscha, entras seligiar dapli cun Kristus, viver e parter miu avegnir cun carstgauns cun la medema intenziun. Jeu sentevel che quei hagi gronda forza.

Il medem onn ein aunc duas giuvnas da Sumvitg entradas en claustra – ha quei influenzau Vossa decisiun?

Na, quei ei buca stau il cass. Mia sora Margrita ed jeu, nus savevan buca quei ina da l'autra tochen il di ch'ella ha fatg paleis a mi siu misteri. «Jeu vi ir en claustra a Glion.» Jeu havevel il medem misteri, mo cun quei ch'jeu erel aunc empau giuvna hai jeu adina tratg alla liunga il temps per communicar quei en famiglia. Nus essan lu sedecididas da far quei pass il medem di.

Essas Vos carschida si en ina famiglia fetg religiosa?

Gie, nos geniturs eran fetg cartents. Els sefidavan sin Diu en tuttas situaziuns.

Las soras dominicanas lavuran u en claustra ni ordeifer – tgei ei stau Vies pensum?



Sora Armina Maissen da Siltginas/Sumvitg.

FOTO S. ROTHMUND

El noviziat hai jeu luvrau empau daper-tut: sil furs, en iert, en cuschina ed era schubergiau. Suenten il noviziat hai jeu fatg ina scolaziun da biro dad in onn e dapi lu luvrau en l'administraziun dalla claustra, pil pli en la contabilitad.

Ha quei cuntentau Vos?

Damai ch'jeu havevel empriu negin mistregn avon ch'ir en claustra eis ei stau miu gjavisch da saver segidar leu, nua che la cuminonza duvrava. Aschia sun jeu setschentada en biro. Mirond anavos stoi jeu conceder ch'igl ei buca stau adina mia lavur preferida. Jeu erel disada plitost da luvrar da tgierp e quei fagessel jeu aunc oz pli bugen. Denton, il saver esser cheu per la cuminonza, nua ch'ei basegna, ha adina giu prioritad per mei.

Tgei pensum haveis Vos actualmein en claustra a Glion?

Dapi igl onn 2000 sun jeu commembra dil cussegl da nosa cuminonza e sco ta-la secretaria.

Haveis mai giu il gjavisch dad ir ellas missiuns?

Na, schegie che nus havevan in'onda ed ina sora ch'eran a Taiwan. Il survir ella patria ei adina stau per mei aschi impurtont.

Sche Vos mireis anavos sin Vossa veta, tgei ei stau il pli bi?

Jeu hai giu ina biala affonza sin nosa ucliva da Siltginas. Sco la giuvna e la dudischavla buoba da nosa famiglia sun jeu naturalmein vegnida puppergnada empauet e nus havevan fetg buns geniturs. En claustra hai jeu dall'entschatta ennu giu plascher da nosa liturgia, specialmein dallas fiastas grondas. Jeu mirel era bugen anavos sil temps nua che nus havein «midau casa» – quei vul dir – nus havein bandunau la claustra veglia ed essan serendidas el baghetg niev si Quinclas igl anno 1969. Quei ei stau in temps fetg bi ed interessant per mei.

Haveis mai deplorau Vossa decisiun da viver sco muniessa?

Naturalmein hai jeu era giu mintgaton crisas, principalmein all'entschatta. Jeu schavel fetg encrescher. Jeu havess schon era saviu s'imaginar da maridar e fundar famiglia. Mo adina puspei sentevel jeu, na mia via ei en claustra. Sch'jeu mon buca quella via, anfel jeu forse mai ruaus.

Cu Vos essas entrada en claustra fagevan aunc dabia giuvnas quei pass. Oz dat ei strusch muniessas giuvnas – saveis Vos daco che quei ei aschia?

Miu emprem patratg tier quella damonda era pli baul adina: Tgei fagein nus falliu? Oz sun jeu denton perschudida, ei schai buca mo tier nus. Il fundament d'ina veta religiosa sto vegnir tschentaus en las familgas. Jeu sun vegnida formada leu. Ils affons e la giuventetgna han oz aschi bia activitads e pusseivladads ch'ei anflan strusch pli temps per sesezs. Libertad ed indepen-

denza vegn scret grond, negin vul esser ligiaus, paucs vulan esser dependents. Quei ei denton negina premissa per ina veta en cuminonza. Nus essan avisadas ina sin l'autra.

E co ei quei stau da viver cul celibat?

Jeu hai eligiu quel libramein. Mo carstgaun cun sentiments restan ins, Dieu sei ludaus, era en claustra. En da quels muments hai jeu adina anflau forza en l'oraziun. Ei dat ina pasch ch'il mund sez sa buca dar. Il seprofundar en quella dat forza e confiart.

Con temps liber/vacanzas haveis Vos giu sco sora dominicana? Ei quei avunda e co haveis passentau il temps liber?

La vacanzas ein reguladas. Suenten il 50avel onn havein nus quater jamnas vacanzas ed in'jamna exerchezis (dis da reflexiun spirituala). Duront il temps liber gaudel jeu da spassegiar, leger e tedlar musica classica ni era da luvrar, per exempel en iert. Il mintgadi pretendia bia da nus, damai che la lavur schai, muort motiv da vegliadetgna dallas pli biaras soras, sin fetg paucas schuialas. Ella vegliadetgna da pensiun fagess empau dapli temps liber per quei schon bein.

Selegreis silla fiasta da dumengia?

Gie, jeu selegrel sin quella fiasta. Igl ei la fiasta da fideivladad visavi Diu e visavi la cuminonza. Quei ei enzatgei bi e legreivel.

Tgei ei Vies pli grond gjavisch pil futur?

Che nosa cuminonza, aschi attempada e falombra sco ella po veser ora mintgaton, seigi e resti ina glisch da cardientscha e fidonza en nosa regiun.

Sche Vos mireis anavos sin Vossa veta – fagesses aunc ina ga il medem?

Quei ei grev da dir, pertgei oz vivin nus en in auter temps. Da lezzas uras ha quei constau per mei ed a quei sun jeu stada e vi star fideivla. Suenten mia cardientscha ed experientscha savess jeu se-capescha era metter avon ina relaziun stretga cun Diu en veta civila ordvart la claustra.

In di dallas portas aviartas

La claustra da Mustér informescha la publicitad

■ (anr/hh) **Sonda proxima porscha la claustra a Mustér in di dallas portas aviartas. In e scadin ha la pusseivladad da visitar ton la baselgia claustrala che vegn restaurada il mument sco era il gimnasi e siu internat ed il center da clausura e cultura.** Mintgamai allas 11.00, allas 12.00 ed allas 14.00 vegn purschiu la pusseivladad da serender tras las localitads cun guid. Punct da sentupada ei la piazza avon il gimnasi. La viseta guidada cuoza 50 minutas. Dallas 13.00 entochen allas 14.00 vegn purschiu in'orientaziun ella Sala Peter Kaiser. Suenten il beinvegni entras avat *Vigeli Monn* vegn mussau in film davart la restauraziun dalla baselgia ed offeriu enzatgei da magliar e da beiber.

La claustra da Mustér ha sviluppu in'activitad publica ils davos onns. Aschia eis ella sesaviarta pli e pli era per persunas che vulan far vacanzas sisum la Surselva ni guder in program special, offerius dalla cuminonza claustrala. Per quei motiv ein pliras localitads vegnidas midadas en



La fatschada dalla baselgia da s. Martin dalla claustra a Mustér ei restaurada e se presenta en nova tarlischur.

FOTO H. HUONDER

combras d'hotel cun in standard da hotellaria da quater steilas. Pli e pli vegn la Sala Peter Kaiser nezegiada era per arranschaments publics, il medem vala per la Stiva s. Placi. Ensemen cun la Sala da pelegrins e la terrassa fuorma ella ina part dalla nova purschida gastronomica.

Da gronda muntada per la regiun e per la formaziun ei il gimnasi, la scola media dalla Surselva. Quella ei sesaviarta ils davos onns pli e pli era per studentas e students digl'exteriur. La finfinala exista sonda proxima era la caschun da visitar il museum dalla claustra. Quei ei pusseivel per in prezzi reduciu. In eveniment special da sonda proxima ei segiramein la pusseivladad da saver prender investa dallas lavurs da restauraziun e sanaziun dalla baselgia da s. Martin. Las lavurs ein vegnidas lantschadas l'entschatta digl'onn e cuozan entochen igl atun 2019. Per la fiasta dil patrun baselgia ils 11 da november 2019 vegn ella puspei aviarta.

Sonda, ils 29 da settember 2018 dallas 11.00 entochen allas 15.00.

■ PCD DALLA FOPPA

Periclitescha e-voting ils dretgs fundamentals?

(cp) Malgrad adina dapli vuschs scepticas ha il cussegl federal deciduu il zercladur vargau d'introducir e-voting sco canal da vuschar equivalent all'urna ed alla votaziun a scret. Tenor siu avis sto e-voting far part dalla participaziun democratica ed el 21avel tschentaner. Denton seregheglia opposiziun encunter e-voting. In'iniziativa ei en preparaziun che vul scumandar e-voting per silmeins diesch onns. Motiv persuenten ein cunzun resalvas pertuccont la segirtad. Autras tiaras han deciduu da desister sin e-voting ni han frenau projects currents. Periclitescha e-voting ils dretgs fundamentals dalla Svizra? Ni ein talas resalvas temas nunmotivadas? Savess e-voting procurar che dapli persunas separticipassen a votaziuns? La pcd Foppa envida *Timo Schneider*, deputau dalla pcd Cuera e president dalla pcd giuvna Svizra, e *Thomas Casanova*, anteriur deputau, advocat e cumissari per il schurmetg da datas dil cantun Grischun, da discutir quellas damondas. L'occurrentia publica vegn moderada dils deputai *Carmelia Maissen* e *Kevin Brunold* ed ha liug mardis, ils 2 d'october 2018 allas 20.00 en sala dalla Casa Cumin a Glion.